

# Kolej Yale-NUS, Surbana Jurong bekerjasama uji huraian bandar bijak

KOLEJ Yale-Universiti Nasional Singapura (NUS) dan Surbana Jurong (SJ) akan bekerjasama menguji huraian bandar bijak di kampus tersebut.

Menurut kenyataan mereka kelmarin, kedua-dua pihak akan memanfaatkan kepakaran dan sumber masing-masing bagi membangunkan pelan induk digital *Bandar Bijak dalam Kampus*, yang juga daya usaha Yale-NUS.

Mereka memeterai Memorandum Persefahaman (MOU) sambil disaksikan Menteri Negara Kanan (Perdagangan dan Perusahaan) Dr Koh Poh Koon dalam majlis di kampus Yale-NUS.

Di bawah kerjasama itu, antara lain, mereka saling mengongsi pengetahuan; menjalankan ujian; dan memperhalusi inovasi teknologi serta latihan pelajar.

Contohnya, SJ akan menguji huraian seperti sistem peman-tauan jangkaan lif di kampus, yang bertujuan memperbaiki kemudahan kediaman.

Pelajar dan kakitangan Yale-NUS akan memainkan peranan aktif mempertingkatkan prototaip bersama SJ.

Kenyataan itu juga berkata usaha tersebut bermatlamat memperkaya kehidupan unik dan model pembelajaran Yale-NUS, yang menyediakan sekitaran ideal menguji huraian teknologi SJ.

Buat masa ini, kampus seluas 64,000 meter persegi itu men-empatkan lebih 800 penduduk, termasuk pelajar.

Profesor Tan Tai Yong, Presiden Kolej Yale-NUS, berkata pelajar memiliki sikap ingin tahu yang membolehkan mereka berinovasi.

“Mereka sudah bersedia dan memiliki kelengkapan cukup untuk meneliti usaha bandar bijak serta menyumbang kepada kemajuan lanjut bagi memperbaiki cara kehidupan.

“Kakitangan fakulti kami juga dalam kedudukan baik menyumbang kepakaran penyelidikan kepada projek penyelidikan bandar bijak ini,” ujarnya.

Ketua Pegawai Eksekutif Kumpulan SJ, Mr Wong Heang Fine, berharap kerjasama bermakna itu akan menjana idea kreatif huraian bandar bijak pada masa depan.